

FORUM ONG TIMOR LESTE THE EAST TIMOR NGO FORUM



Caicoli Street, Dili -Timor Leste / Phone +670 332 1005 or 7236782 / forumngo.tls@gmail.com

APREZENTA IHA DEVELOPMENT PARTNER MEETING
DILI CONVENTION CENTRE, TIMOR-LESTE
15 - 16 MAIU 2012

Lian maklokek

Organizasaun Sosiedade Sivíl, partikulármente organizasaun naun governmental hotu ne'ebé hamahon iha Forum ONG Timor-Leste (FONGTIL) hakarak hato'o parabéns ba Timor-Leste ba selebrasaun aniversario Restorasaun Independénsia ba dala-10.

Ami hakarak hato'o apresiasaun ba rekoñesimentu nasional ba papél organizasaun sosiedade sivíl nian hanesan pilar ida importante ba harii Timor-Leste ida libertadu, demokrátiku, i prospero.

Ami hakarak benvindu Parseiru dezenvolvimentu hotu, mai selebra hamutuk ho povu Timor-Leste nia-festa restorasaun independénsia. Imi la'o iha Estrada protokolu ida kabeer, maibé ami husu atu imi hatene ami nia istória, ami nia realidade sosio-kultural, no ami nia política dezenvolvimentu ekonomia nian.

Nai ulun hotu, Bainaka espesiál no Parseiru dezenvolvimentu hotu mak ami respeitu,

Ita boot sira hamutuk tiha ona ho ami husi tinan 1999 (Rihun ida atus sia i sia-nulu resin sia) harii ami nia rain husi ahukdesan, ami nia Governu husi ida ne'ebé mai hahú, to'o ida ohin mak organiza eventu ida ne'e esforsu maka'as tiha ona, ho limitasauns hotu, sira halo di'ak hodi atinje susesu ne'ebé ita hotu hakarak hetan. Maske seidauk liberta an husi konsekuénsia hotu husi konflitus no kiak, ita selebra hamutuk liberdade no espasu nakloke atu harii Timor-Leste ida ne'ebé moris iha pás no estabilidade.

Bainaka no Parseiru dezenvolvimentu hotu mak ha'u respeitu,

Ha'u hakarak lori forum ida ne'e ba hatene ami nia realidade, ami apresenta de'it mak faktus balun ne'ebé ami ho imi, ita seidauk halo mudansa.

1. Investimentu iha edukasaun

Ami kongratula esforsu hotu hodi hadi'ak 30%-resin husi eskola rihun ida atus limaresin, no hasa'e nível partisipasaun iha eskola hotu. Maske nune'e, asesu ba ensinu pre-primária no primária sei menus, no eskola báziku hotu nafatin hasoru difikuldade ambiente eskola ne'ebé la organizadu no la orienta ba promove "interese di'ak" alunos no profesór nian. Liu tan ida ne'e, violénsia iha ambiente eskola nafatin sai hanesan asuntu ida ne'ebé preokupa, liuliu tanba laiha akuntabilidade sai hanesan impedimentu ba susesu política kona-ba zero toleránsia ba violénsia iha eskola.

Ami enkoraja ami nia Governu atu esforsu an liu tan no hasa'e kometimentu atu bele atinje duni objetivu MDGs ba Edukasaun no objetivu Edukasaun Ema Hotu (EFA) iha tinan 2015 liu husi hasa'e investimentu ba edukasaun to'o 20% husi OJE kada tinan ba Edukasaun. Governu ida atu mai tenke fó prioridade ba estabelese standard nacionál ba konstrusaun eskola no hasa'e partisipasaun iha eskola báziku iha distritu sira ne'ebé iha problema edukasaun as hanesan distritu Ermera, Aileu, Viqueque no Lautem.

Ami enkoraja parseiru dezenvolvimentu hotu atu tulun ami nia Governu atu bele atinje tarjetu sira temin iha leten.

2. Investimentu iha saúde

Ami kongratula Governu liu husi ministériu saúde ba nia projeto kona-ba estratéjia nacionál ba hatún suhu malnutrisaun nian. Dadus DHS 2009/2010 hatudu katak ita nia oan sira hasoru problema malnutrisaun as, rezulta labarik sira frazil hasoru moras da'et no mate molok halo tinan lima. Ami rekomenda Governu atu tau atensaun sériu ba asuntu ida ne'e no tau atensaun seidu ba feto isin-rua no bebé sira iha hospital no mós iha komunidade. Ami rekomenda parseiru dezenvolvimentu hotu atu tulun ami nia Governu ida atu mai hodi hadi'ak situasaun ne'e.

3. Redusaun kiak

Tinan kotuk, ami nia Estadu simu bainaka espesiál ida "UN Special Rapporteur on Extreme Poverty". Ha'u ata hetan priviléjiu boot akompaña nia hodi hi'it an ba komunidade nia leet ba haree kondisaun moris komunidade nian. Ami hakarak hato'o obrigado ba komunidade Kamea, Kaikoli, Galitas no sira seluk, tan simu ami nia vizita ho di'ak. Nia vizita, nia apresenta situasaun kritiku lubun ida kona-ba kiak iha Timor-Leste.

Nia preokupa tebes ho situasaun ai-han no nutrisaun, edukasaun, rai no kondisaun hela-fatin, protesaun sosiál, dezempregu, no asesu ba justisa. Nia deskobre katak 58% ema iha rai ida ne'e sofre malnutrisaun króniku, 90% foin-sa'e sira la asesu ba servisu, fundus ba fornesimentu públiku ba edukasaun, saúde, seguransa ai-han no seguransa sosiál hamenus tiha hodi ba investe maka'as iha projeto infraestrutura nian.

Rai ida ne'e nia progresu ekonomia sentralizadu hela iha kapitál Dili, ema riku iha Dili as, ema kiak rabat rai iha area rural as liu. Ba asuntu ida ne'e, ami rekomenda atu Governu tenke tau atensaun as ba seguransa ai-han hanesan pilares importante hodi hadi'ak situasaun malnutrisaun no tenke garante investimentu sustentável iha area agrikultura hodi asegura seguransa ai-han ba oin.

Liu tan ida ne'e, iha situasaun ne'ebé populasaun barak liu mak sei kontinua hela iha kondisaun uma at, bee moos laiha, no saneamentu at. Hanesan ne'e hela, iha tinan kotuk no tinan ida ne'e Governu halo despeju obrigatoriu ba komunidade ne'ebé susar hela atu asesu ba hela-fatin dignu. Iha kazu despeju obrigatoriu hotu, Governu uza forsa polísia no seguransa sivíl hodi halo destroisaun ba komunidade nia uma, entre kazu sira ne'e labarik no feto isin-rua hasoru situasaun difisil liu. Hanesan ne'e hela tan, iha kada konflitus grupu kriminál sira hetok halo terus liu tan ho sunu no harahun uma komunidade nian.

Governu iha hela planu atu halo estensaun ba Aero-Portu foun iha Dili, no mós planu atu halo despeju ba bairru tuan barak iha Dili ba "dezenvolvimentu", ba asuntu ida ne'e ami rekomenda atu Governu tenke kria uluk hela-fatin alternativu molok halo despeju ba komunidade nia uma no rai, no tenke introduz *master-plan* (planu espasu) ba kapitál distritu hotu atu komunidade hatene fatin seguru ba hela-fatin nian.

4. Foin-sa'e no dezempregu

Ami sosiedade sivíl prienxe tiha ona lakuna ida kona-ba skill foin-sa'e nian liu husi investe iha hasa'e kapasidade professional no kria servisu rasik. Maske nune'e, número dezempregu ne'ebé as presiza intervensaun integradu liu husi kria kampu servisu no prodús forsa traballadór tuir nesesidade merkadu laboral. Ami rekomenda atu parseiru dezenvolvimentu tulun Governu ida atu mai, hodi halakon situasaun kiak liu husi adopta rekomendasau sira ne'ebé ami apresenta iha leten.

5. Setór seguransa, lei no orden

Ami observa Governu investe liu iha *Repressive Force* no hamenus tiha investimentu ba *Persuasive Response*. Ami rekomenda atu Governu kria servisu metin ho parseiru dezenvolvimentu atu promove kultura seguransa komunitária liu husi polisiamentu komunitária iha PNTL. Iha parte seluk, hakbiit akuntabilidade instituisaun polísia nian atu bele promove fiar ba integridade instituisaun ida ne'e nian. Tinan ida ne'e iha proposta kona-ba forsa militár voluntáriu no treinamento kona-ba uza armas. Bainhira foin-sa'e rihun hetan treinamento hanesan forsa, saida mak akontese se iha loron ida NASAUN laiha osan atu selu sira?, ami hakarak Timor-Leste ida ne'ebé libre husi krime organizadu uza armas.

Misaun UNMIT nian atu remata iha rohan husi tinan ida ne'e, ami hein hela katak sei iha espasu naklokek atu iha política ida ne'ebé la'ós orienta de'it ba seguransa polísia no militár, maibé énfaze ba seguransa umana. Iha país dezenvolvidu sira, sidadaun sente seguru bainhira sira la hamlaha ona, sira iha hela-fatin seguru, iha

rendimentu, libre husi moras-da'et, no hatene hakerek no lee. Ami fiar katak sidadaun nasaun ida ne'e nian iha direitu hanesan ba seguransa sosiál hanesan nasaun riku sira.

6. Asesu ba justisa

Ami observa projetu pilotu *mobile court* hanesan dalan atu asegura asesu ba justisa iha area rurais, ida ne'e importante atu asegura asesu hanesan ba justisa formal. Maske nune'e, ami preokupa ho prosesu justisa ne'ebé neineik liu ba kazu korrupsaun no kazu sivíl iha tribunal.

Hanesan ne'e hela, asesu ba defensoria legal limitadu tebes tanba númeru ne'e limitadu no mós tanba tribunal uza lian ne'ebé ema Timoroan barak la uza. Iha kontekstu nasaun ida ne'ebé nia populasaun laiha kbiit atu seluk advogadu privadu, halo sira lakon direitu ba justisa ne'ebé justu no lalais, barak husi sira iha prizaun ba tempu naruk laiha revizaun periódiku ba sira nia kazu.

7. Justisa tranzitóriu

Ami la haree iha mudansa política kona-ba asuntu justisa ba krime pasadu liuliu kona-ba *Reparation Program* ba vítima husi krime pasadu. Órgaun Lejizlativa ida ne'e nia mandatu iha rohan ona, maibé asuntu ida kona-ba *Institute of Memory* seidauk hetan rezolusaun. Ami rekomenda atu molok remata mandatu Parlamentu Nasionál ida ne'e nian, asuntu justisa ba krime pasadu no Institute of Memory tenke hetan desizaun político ne'ebé reprezenta interesse povu nian. Ami konta ho parseiru dezenvolvimentu hotu nia apoiu atu tulun ami nia Governu hodi harii justisa ida ne'ebé forte iha Timor-Leste.

8. Relasaun ho sosiedade sivíl

Parseiru dezenvolvimentu sira nia apoiu ba organizasaun sosiedade sivíl menus maka'as husi 80% tun ba menus husi 20%, donor barak mak ikus-ikus ne'e deside hapara apoiu, balun troka sira nia apoiu husi *grants* troka ba *loans*, sira ne'e hotu sei hatodan liu tan Timoroan iha future.

Ha'u remata hodi hato'o katak ami fiar imi sei tau ba konsiderasaun ami nia vizaun hanesan sosiedade sivíl ne'ebé forte, independente no iha kompeténsia atu hola papél forte hodi harii Timor-Leste ba oin. Ami prontu hela tiha ona atu tama iha diálogu ba implementasaun *New Deal*.

Obrigado

João Soares R.Pequinho,
Diretor Ezekutivu Forum Tau Matan (FTM)
Membru Board ONG Forum (FONGTIL)
Representativu, Timor-Leste Coalition for Education (TLCE)
Hp (+670) 724 2099/E-mail: joaopequinho@yahoo.co.uk